

ADYAYA I

PURWAKA

1.1 Dadalan Pikobet

Kurikulum Merdeka Belajar pinaka silih tunggil awig-awig guru wisesane anggen nincapang *mutu* utawi *kualitas pendidikan* sampun kalaksanayang ring sekolah-sekolah. *Kurikulum* puniki kaaptiang prasida ngwantu sisia lan guru ngresepang pamlajahan nenten kaiket antuk genah lan galah. Antuk punika kasayagayang makudang carca *komponen* pamlajahan minakadi *model, metode* taler sane lianan, kaaptiang mangda ngwantu guru ngelaksanayang pamlajahan kadasarin antuk *kurikulum* puniki. Pinaka *kurikulum* anyar, kari akeh pikobet sane kakeniang, silih tunggilnyane pamlajahan punika dereng prasida *efektif*, napi malih ring pamlajahan *muatan lokal* sekadi Basa Bali. Basa Bali wantah polih galah pamlajahan kalih jam, taler nenten kautamayang santukan ring SMA/SMK pastika ngutamayang pamlajahan sane mapaketan sareng *jurusan* para sisia (IPA, IPS, Akuntansi, Pemasaran, taler sane lianan).

Sapunika taler pikobet sane kakeniang ring SMKN 1 Singaraja, mawinan ngamerihin galah *praktik* mangda para sisiane uning kahanan ring genah pakaryan benjang pungkur. Kahanan puniki kapatutang olih Bapak Drs. Ngurah Alit, M.Si pinaka guru Basa Bali. Dane taler ngwewehin rikala pamlajahan ring kelas, pastika wenten sisia sane nenten nyarengin pamlajahan santukan *praktik* lan *piket*. Manut para sisia, sane nyarengin piket punika kirang langkung 1-2 sisia ring soang-soang kelas, magenti sabilang minggu. Malianan sareng piket, yening praktik punika patut kasarengin olih akehan sisia ri sajeroning akelas, ngawinang

para siswa sane sareng paktik nenten prasida nyarengin pamlajah. Nika sane ngawinang pamlajahan nenten mamargi antar, makudang-kudang siswa taler dereng prasida polih nilai becik manut sane sampun kaaptiang.

Saking pikobet ring ajeng, guru patut nyayagayang pamlajahan sane *inovatif* nganutin kahanan siswa ring kelas. Ring *Kamus Bahasa Indonesia* (2003), *inovatif* wit saking kruna “*inovasi*” sane mateges anyar. *Inovatif* ring pamlajahan prasida kaartosang nganyarin tata titi pamlajahan. Manut Syiah lan Kariadinata (2009 : 16), pamlajahan *inovatif* inggih punika pamlajahan sane prasida nyelarasang kawidyan (untek kebot) taler kawisayan (untek tengawan) siswa ngawigunayang sarana *teknologi*. Pamlajahan *inovatif* ngawigunayang tata titi pamlajahan sane prasida ngicen iusan (stimulus) mangda para siswa seneng nyarengin pamlajahan. Ring kurikulum Merdeka Belajar, makudang imba pamlajahan *inovatif* inggih punika sane madasar antuk *Critical Thinking, High Order Thinking Skill* (HOTS), taler *Blended Learning*. Yening nyingakin kahanan ring SMKN 1 Singaraja, *model* sane patut kaanggen inggih punika *model Blended Learning*.

Model Blended Learning inggih punika pamlajahan sane nyampungang pamlajahan langsung (luring) lan pamlajahan *online* (daring). Dwiyono (2018:59) nelatarang *Blended Learning* puniki pinaka *model* pamlajahan campuhan, sane nyampungang pamlajahan masadu ajeng taler sane madasar antuk *teknologi*. Pamlajahan *Blended Learning* puniki prasida kamargiang nganggen makudang piranti, minakadi *Google Meeting, Zoom Meeting, Google Classroom, WhatsApp Grup, Blog*, taler sane lianan. Pamlajahan nganggen *model* puniki akeh kalaksanayang rikala *pandemi Covid'19*, sakewanten ngantos mangkin kari kaanggen yadiastun sampun mawali ka pamlajahan langsung (luring). Silih

tunggil sane ngawinang inggih punika santukan *model* puniki becik pisan kaanggen panyangkep pamlajahan langsung sida ngwantu siswa ngresepang pamlajahan Basa Bali.

Pamlajahan Basa Bali ngawigunayang *model Blended Learning* puniki pinih mawiguna anggen ngwantu guru rikala nyobiahang imba saking materi pamlajahan (referensi). Guru prasida nyayagayang *blog* pamlajahan, dagingnyane materi-materi pamlajahan taler imba sane sampun kadadosang siki mangda siswa punika prasida ngrereh materi lan imbanyane. Nyayagayang *blog* puniki pinih becik, santukan yadiastun sampun kasobiahang ring kelas, manut *model Blended Learning* puniki guru patut nyayagayang genah *online* mangda pamlajahan punika prasida karesepang malih olih siswa, napi malih siswa sane nenten nyarengin pamlajahan ring kelas santukan *praktik* utawi *piket* punika. Ring *blog* puniki taler guru ngicen galah ring siswa ngunggahang pitakennyane, mangda siswa sane lek metaken ring kelas madue kawiryang mapitaken ring *blog*. Antuk kawigunan puniki *model Blended Learning* sane nganggen *blog* pinih becik kaanggen ring pamlajahan Basa Bali utamanipun yening para siswa kaaptiang ngawetuang pikolih sekadi pamlajahan kawagedan nyurat.

Kawagedan nyurat inggih punika silih tunggil kawagedan mabasa sane pinih mawiguna lianan ring ngwacen, nguratiang taler mababaosan. Manut Ariadinata (2009 : 5) kawagedan nyurat inggih punika sarana sane pinih becik anggen nyobiahang lan ngawedarang daging pikayun. Yening sampun waged, panyurat prasida ngawedaran daging pikayun sane becik. Kawagedan nyurat madue kalih pahan, inggih punika kawagedan nyurat sastra (fiksi) lan kawagedan nyurat *non* sastra (ilmiah). Kawagedan nyurat sastra madaging sasuratan nenten yakti wenten

ring kahuripan (karangan), imbanyane sekadi satua, novel, taler sane lianan. Kawagedan non sastra imbanyane sekadi sasuratan sane madue tata titi jangkep taler kaanggen ring pamlajahan, sekadi ring pamlajahan nyurat artikel.

Pamlajahan nyurat artikel inggih punika silih tunggil pamlajahan sane kaaptiang prasida katelebin olih para sisia. Artikel sane pinaka sasuratan ilmiah inggih punika sasuratan sane kadasarin antuk kasujatian ring kahuripan. Manut Ensikologipedia Pers Indonesia, artikel inggih punika silih tunggil sasuratan sane muatang pangwedhar indik pikobet nganutin tata cara sane patut utawi *lugas*. Pamlajahan nyurat artikel puniki mawiguna pisan majeng ring sisia, anggen nyangih kawagedan masasuratan. Pamlajahan puniki taler mawiguna kaanggen olih para sisia yening pacang ngelanturang galah brahmacari utawi sane meled makarya. Punika mawinan para guru patut ngamecikang pamlajahan nyurat artikel ngawigunayang *model Blended Learning* antuk ngaryanin *blog* pamlajahan.

Ngaryanin *blog* ri sajeroning pamlajahan nyurat artikel mabasa Bali ngawigunayang *model Blended Learning* prasida kamargiang rikala guru sampun nyayagayang materi ring *blog* sane kakaryanin. Kapertama guru musti mupulang materi pamlajahan sane marupa materi sasuratan, video taler imba artikel sane anut ring pamlajahan. Wusan punika, guru patut ngelaksanayang pamlajahan ring kelas sekadi sane sampun lumrah. Sadurung pamlajahan kalaksanayang, guru patut eling ngunggahang *link blog* pamlajahan punika ring grup *WhatsApp* mangda materi prasida kawacen olih sisia utamannyane sane nenten nyarengin pamlajahan ring kelas. Yening sampun galah para sisia polih pakaryan nyurat artikel, para sisia taler ngunggahang pikolihnyane ring *blog* soang-soang nganutin

pawarah guru. Ring *blog* punika taler para sisia prasida saling tampenin pikolih soang-soang saking pamlajahan nyurat artikel mabasa Bali.

Tiosan ring tetilikan puniki, sadurungnyane sampun wenten sane ngambil tetilikan asoroh indik *model Blended Learning*. Kapertama wenten tetilikan saking I Kadek Eka Muliana (2022) sane mamurda “Nincapang Kawagedan Nyurat Aksara Bali Nganggen Aplikasi PaTik Bali Antuk Model Pamblajahan Blended Learning Ring Sisia Kelas VII SMP Katolik Soverdi”. Taler kaping kalih wenten saking Luh Widiasih (2022) sane mamurda “*Metode Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja”. Pabinayan tetilikan puniki sareng tetilikan dumun inggih punika ring materi sane kaambil, jejering lan genah tetilikan taler piranti sane kaanggen.

Tetilikan puniki kaanggen nganutin sareng kahanan taler sane kabuatang olih sisia lan guru. Majeng ring sisia, *model* puniki pacang ngwantu sisia ngresepang pamblajahan, utamannyane sisia sane polih *praktik* utawi *piket*, gelis lali sareng palajahan ring kelas, taler sisia sane dereng lagas metaken utawi mapenampen ring kelas. Majeng ring guru, *model* sane kaanggen puniki prasida ngwantu ngamargiang pamblajahan sane *inovatif* lan kasenengin olih sisia. Ri sampun ngawigunayan model anyar, *inovatif* lan *kreatif*, kaaptiang prasida nincapang kawagedan para sisia taler nudut kayune para sisia mangda seneng malajah. Puniki sane ngawinang panilik pacang ngambil tetilikan sane mamurda “Model *Blended Learning* Kaanggen Nincapang Kawagedan Nyurat Artikel Mabasa Bali ring Kelas XI AKL D SMKN 1 Singaraja”.

1.1 Ngrereh Pikobet

Sadurung ngelaksanayang tetilikan, patut kalaksanayang praktiasa sane matetujon mangda panilik uning kahanan pamlajahan ring kelas. Ri sajeroning praktiasa punika, makudang-kudang pikobet sane kapolihang inggih punika 1) sisia nenten polih buku pamlajahan, wantah *filenyane* sane kasobiahang, 2) kekirangan galah pamlajahan, 3) kawentenan *piket* taler *praktik* sane ngawinang makudang sisia nenten prasida nyarengin pamlajahan, 4) *motivasi* sisia rikala nyarengin pamlajahan Basa Bali nika kirang utawi *rendah*, 5) guru dereng polih *model* pamlajahan sane patut mangda prasida nyubalang pikobet sane wenten. Pikobet-pikobet punika ngawinang sisia nenten ngresep pamlajahan taler dereng prasida polih nilai sane becik. Yening wenten *model* anyar sane ngawinang sisia prasida ngakses pamlajahan ring galah sane nenten kaiket pastika pacang ngwantu sisia. Antuk punika ring tetilikan puniki pacang nganggen *model Blended Learning* rikala pamlajahan Artikel Mabasa Bali, mangda para sisia prasida ngresep pamlajahan yadiastun nenten nyarengin pamlajahan ring dinane punika.

1.2 Ngwatesin Pikobet

Kawentenan watesan ri sajeroning tetilikan puniki nenten lian kadasarin antuk kahanan kelas taler sane kabuatang olih para sisia. Manut pikobet-pikobet ring ajeng, panilik nyutetang pacang nelebin *model* pamlajahan sane pacang kaanggen, inggih punika *model Blended Learning*. *Model* puniki pacang kawigunayang ri sajeroning pamlajahan Artikel Mabasa Bali ring kelas XI AKL D SMKN 1 Singaraja. Panglaksana saking pamlajahan Artikel Mabasa Bali nganggen *model Blended Learning* puniki pacang ngawigunayang piranti marupa *blog* pamlajahan.

Blog puniki pacang kadagingin unteng pamlajahan artikel jangkep sareng imba sane marupa gambar taler video. Kawentenan pamlajahan nganggen *model Blended Learning* puniki kadadosang penyangkep ri sajeroning pamlajahan langsung, mangda prasida ngwantu pikobet sisia ring pamlajahan, taler mangda prasida mangda uning sapunapi penampen (respon) sisia sane wenten ring kelas XI AKL D SMKN 1 Singaraja.

1.3 Bantang Pikobet

Malarapan antuk dadalan pikobet sane sampun kapolihang, bantang pikobet saking tetilikan puniki inggih punika sekadi ring sor:

1. Sapunapi pidabdab ngelaksanayang pamlajahan Artikel Mabasa Bali nganggen *model Blended Learning* ring kelas XI AKL D SMKN 1 Singaraja?
2. Sapunapi pikolih saking ngawigunayang *model Blended Learning* rikala ngelaksanayang pamlajahan Artikel Mabasa Bali ring Kelas XI AKL D SMKN 1 Singaraja?
3. Sapunapi penampen sisia rikalaning kalaksanayang pamlajahan Artikel Mabasa nganggen *model Blended Learning* ring kelas XI AKL D SMKN 1 Singaraja?

1.4 Tetujon Tetilikan

Malarapan antuk bantang pikobet sane sampun katelatarang ring ajeng, tetujon saking tetilikan puniki inggih punika:

1. Mangda uning lan prasida nelatarang pidabdab rikalaning ngelaksanayang pamlajahan Artikel Mabasa Bali nganggen *model Bended Learning* ring kelas XI AKL D SMKN 1 Singaraja.

2. Mangda uning pikolih saking ngawigunayang *model Blended Learning* ring pamlajahan Artikel Mabasa Bali ring kelas XI AKL D SMKN 1 Singaraja.
3. Mangda uning sapunapi penampen sisia rikalaning kalaksanayang pamlajahan Artikel Mabasa Bali nganggen *model Blended Learning* ring kelas XI AKL D SMKN 1 Singaraja.

1.5 Kawigunan Tetilikan

Tetilikan puniki madue kawigunan sane prasida ngwantu sisia lan guru rikala ngelaksanayang pamlajahan ring kelas, inggih punika sekadi ring sor:

1. Kawigunan Pamucuk (Teoritis)

Kawigunan pamucuk (teoritis) puniki matetujon mangda nyihnayang sapunapi kawigunan tetilikan sane kakaryanin ring kawidyan/pamlajahan. Yening kaselehin, *model* pamlajahan sane kawigunayang ring tetilikan puniki sampun anut sareng kurikulum taler ciri sekolah sane pinaka objek tetilikan (SMKN 1 Singaraja). *Model Blended Learning* sane kari anyar prasida ngwantu sistim *pendidikan* ring Indonesia taler relevan sareng sane kaaptiang ring pamlajahan, ngawinang *model* niki becik pisan yening kawigunayang. Kawentenan *model-model* pamlajahan sekadi puniki taler sane mresidayang ngawinang *pendidikan* Indonesia antuk papineh lan tata cara ngolah kelas sane kalaksanayang olih guru.

2. Kawigunan Panglimbak (Praktis)

Kawigunan panglimbak (praktis) puniki matetujon mangda ri sajeroning tetilikan prasida ngamolihang cawisan saking pikobet sane wenten, mangda

prasida ngwantu sang sane wenten paiketannyane sareng tetilikan puniki, inggih punika:

a. Majeng ring Sisia

Majeng ring sisia, *model* pamlajahan sane kaanggen ring tetilikan puniki prasida ngwantu sisia sane madue pikobet, umpami nenten ngaresep rikalaning mirengang pamlajahan ring kelas, polih pakaryan (*tugas*) *piket* saking sekolah, utawi kari nyarengin *magang* sane ngawinang sisia nenten akeh madue galah malajah ring sekolah. *Model Blended Learning* puniki ngawinang sisia mresidayang nyarengin pamlajahan ring genah lan galah sane *fleksibel*, taler manut sareng konsep *Merdeka Belajar*.

b. Majeng ring Guru Basa Bali

Majeng ring guru, tetilikan puniki prasida kawigunayang ngwantu rikalaning ngamargiang pamlajahan nganggen *model* pamlajahan sane manut saking kahanan lan kabuatang olih sisia.

c. Majeng ring Panilik

Majeng ring panilik, unteng tetilikan taler napi sane kawetuang rikalaning nganggen *model* pamlajahan punika sane prasida dados kapustakaan taler mulat wali yening benjang pungkur ri sampune dados guru mangda prasida ngemargiang pamlajahan sane kapredi olih sisia.

d. Majeng ring Panilik Lianan

Majeng ring panilik sane lianan, tetilikan puniki prasida kaanggen pratiwimba, tetimbang lan sasuluh rikalaning mapikenoh pacang ngelaksanayang tetilikan sane madue kapatehang sareng tetilikan puniki.